

**Uunga siunnersuut: Inatsisartut aalisarneq pillugu inatsisaata allanngortinneqarnera
pillugu Inatsisartut inatsisaat nr. xx, xx.xxx-2012-imeersoq**

(Sinerissamut qanittumi qaleralinniarnermi pisassiissutit qummut killissaat pillugu
aalajangersakkamik ikkussineq)

(Aalisarnermut, Piniarnermut Nunalerinermullu Naalakkersuisoq)

pillugu

Aalisarnermut, Piniarnermut Nunalerinermullu ataatsimiititaliap

ISUMALIUTISSIISSUTAA.

Siunnersuutip aappassaaneerpeqarnerani saqqummiunneqartoq.

Aalisarnermut, Piniarnermut Nunalerinermullu ataatsimiititaliap suliarinninnerani
kingullermik ilaasortat uku peqataapput:

Inatsisartutmedlem Aqqaluaq B. Egede, Inuit Ataqtigiit, formand

Inatsisartutmedlem Finn Karlsen, Siumut

Inatsisartutmedlem Hans Aronsen, Inuit Ataqtigiit

Inatsisartutmedlem Hans Enoksen, Siumut

Inatsisartutmedlem Karl Lyberth, Siumut

Inatsisartutmedlem Michael Rosing, Demokraterne

Inatsisartutmedlem Peter Lyberth, Inuit Ataqtigiit

UPA 2012-mi ulloq 3. maj 2012 siullermeerereernerup kingorna siunnersuut
Ataatsimiititaliap misissorpaa.

Siunnersuutip imaa aamma siunertaa

Siunnersuutikkut sinerissap qanittuani qaleralinniarnermi pisassiissutinit tamarmiusunit
pigisat 5 %-inut qummut killilerneqarput. Aalajangersagaq malillugu aqutsiveqarfinni
Upernavimmi, Uummannami aamma Qeqertarsuup Tunuani sinerissap qanittuani
qaleralinniarnermi angallatinut 6 miiterimit takinerusunut ataatsimut pisassiissutigineqartunit
inuit imaluunniit ingerlatseqatigiiffiit toqqaannartumik imaluunniit toqqaannangitsumik
annertunerpaamik 5 %-it pigisinnaavaat.

Siunnersuutikkut siuliani pisassat killilerneqarnerannik unioqqutitsinermi raajarniarnermi pisassat killilerneqarnerannik unioqqutitsinermi maleruagassat assigalugit akiliisitsisoqarsinnaanera periarfissaalersinneqarpoq.

Siunnersuut sinerissamut qanittumi qaleralinniarnermi angallatinut 6 miiterit sinnerlugit takissusilinnut inunnut ataasiakkaanut pisassiissutinit niuerutigineqarsinnaasunik pilersitsineq Namminersorlutik Oqartussat akuersissutit pisassiissutillu pillugit nalunaarutaanut nr. 1, 2. februar 2012-imi aamma Namminersorlutik Oqartussat sinerissamut qanittumi qaleralinniarneq pillugu nalunaarutaannut nr. 2, 2. februar 2012-imi atortussanngortinneqartunut qanittumik attuumassuteqartutut isigineqassaaq.

Naalakkersuisut naliliipput, qummut killiliinikkut pisassiissutinit pigisat ingerlatsisunut amerlanerpaanut siaruarneqarnissaat qulakkeerneqassasoq aammalu aalisarnermi aningaasatigut imminut nappassinnaassuseqalersitsinissaq qulakkeerneqassasoq.

Siunnersuutip Inatsisartuni siullermeerneqarnera

Siunnersuut partiinit tamanit siamasissumik tapersersorneqarpoq. Inuit Ataqaatigiit siunnersuut tamakkiisumik tapersersorpaat, maluginiarlugulu pisaassiisutit qummut 5 %-imik killilerneqarneranni pisassiissutit nammineq pigisat piginnuttunut ikittuinnarnut eqiterunnissaasa pinngitsoortinnissaat siunertarineqartoq. Siumut siunnersuummut tapersersuivoq, oqaatigaluguli qaleralinniarnermi pisassiissutinit niuerutigineqarsinnaasunik eqqussinermut atatillugu assigiinngitsut erseqqissarnissaat pisariaqartoq. Demokraatit siunnersuummut tapersersuiipput, pisassiissutillu niuerutigineqarsinnaasut atuutilersinneqarnerisa tulluartaunera, aamma aqutsisoqarfiit akimorlugit qaleraleqatigiaanik imminnut attuumassuteqanngitsunik peqarfinni killeqanngitsumik aalisarsinnaaneq apeqquserlugit. Taamaattumik Demokraatit oqaaseqartartuat siunnersuuteqarpoq, aqutsisoqarfinni ataasiakkaani tamani pisassiissutit qaffasinnerpaaffissaat atuutilersinneqassasoq.

Tusarniaanermi akissutit

Siunnersuut sap. ak.-inik sisamanik sivilissusilimmik tusarniutigineqarpoq. Tusarniaanermi akissutit aamma Naalakkersuisut oqaasissaanut allattukkat kiisalu Naalakkersuisut Inatsisilerinermi immikkoortortaanit allakkiap assilineri inatsisissatut siunnersuummut tapiliunneqarput. Taakku ataatsimiititaliami suliarinninnermi oqaaseqarfiginissaannut pissutissaqarsimanngilaq.

Apersuineq

Ataatsimiititaliap suliarinninneranut atatillugu Ataatsimiititaliap Aalisarnermut, Piniarnermut Nunalerinermullu Naalakkersuisumut apersuisimavoq. Apersuinissamut aggersaanerup

aamma Naalackersuisunut ilasortap oqaatigisassai pillugit allattukkat isumaliutissiisummut uunga tapiliussatut ilanngunneqarput.

Ataatsimiititaliap siunnersuummik suliaqarnera

Qaleralik oqaluttuarisaanikkut niuerneramilu aalisakkatut isumalluutitullu inuiaqatigiinnut kalaallinut pingaaruteqarluinnartuuvoq. Taamaattumik uumassuseqarnikkut aningaasarsiornikkullu piujuartitsineq tunngavigalugu aalisarnermik inuussutissarsiutip siuarsarneqarnissaa Ataatsimiititaliap tapersorsorpa, taamaalilluni pinngortitami isumalluutivut pingaaruteqartut siunissami suli atorneqarsinnaassammata, kiisalu aalisartunut ataasiakkaanut inuiaqatigiinnullu tamarmiusunut iluaqutaasumik ataavartumik aalisarnek imminut akilersinnaasoq sulissutigineqassamat.

Qaleralinnik aqutsinermut pilersaarut¹ Aalisarnermut, Piniarnermut Nunalerinermullu Naalackersuisoqarfimmeersoq malillugu, qaleralinniaq ilanngaateqareertinnanani agguaqatigiissillugu 140.000 kr.-inik ukiumut isertitaqartarpoq. Matumani aalisarnermit nammineq atuinerup annertussusaa ilanngunneqanngilaq, tamannali inoqutigiinnut aningaasaqarnikkut pingaaruteqartuusutut nalilertariaqarpoq. Tamatumunnga sanilliullugu kalaaleq innuttaasoq nalinginnaasumik agguaqatigiissillugu 194.000 kr.-inik ukiumut isertitaqartarpoq. Taamaalilluni isertitat annertuumik assigiinngiissuteqarput. Ataatsimiititaliap maluginiarpaa, paasissutissat tamakku malillugit aalisarnek aningaasarsiornikkut annertunerusumik imminut akilersinnaanngitsoq. Aqutsinermut pilersaarummi aamma allaaserineqarpoq, qaleralinniarnermi angallatit 1250-it sinnerlugit TAC-tut killiunneqartunik pisassat nungunnissaasa tungaanut pisaqarneqqusaallutik aalisartartut. Angallatit akornanni unammilleqatigiinneq immaqa aalisartut amerlanerpaartaasa 2009-mi qaleralinnik 30 tonsit ataallugit tunisisimanerannut pissutaaqataasinnaavoq. Taamaattumik Ataatsimiititaliap pitsaasutut isumaqarfigaa, inatsisissatut siunnersuuteqarnikkut aalisarnerup aningaasarsiornikkut imminut akilersinnaanerulernissaanut ilapittuutaasussamik iliuseqartoqarmat.

Biologinit siunnersuinermit Qeqertarsuup Tunuani qaleralinniarnermi 2007-imut aamma 2008-mut ukiumut ataatsimut TAC-tut inassutigineqartut 12.500 tonsiupput. 2012-imi biologit inassuteqarput, Qeqertarsuup Tunuani pisassatut akuerineqarsinnaasut tamarmiusut ikilineqassasut, taamaalillunilu 8.000 tonsit sinnerneqassanngitsut. Naalackersuisut biologinit siunnersuinerit naapertorlugit TAC-mik ikililiipput. Aqutsisoqarfinni Uummannami aamma

¹ Qaleralinnik aqutsinermut pilersaarut: "Sinerissap qanittuani qaleralinniarnermi nutaamik iluarsivigineqarnissaanut periaatsit, 2011", Aalisarnermut, Piniarnermut Nunalerinermullu Naalackersuisoqarfik

Upernavimmi piffissami tassani TAC inassutigineqartoq aalaakkaasimavoq². Ataatsimiititaliap naatsorsuutigaa, Naalakkersuisut biologinit siunnersuinerit naapertorlugit sulit TAC-mik aalajangiisassasut, taamaalilluni qaleralinnik isumalluutit atuinuq uumassuseqartunik piujuartitsineq tunngavigalugu sulit ingerlanneqassasooq isumannaarneqassammat.

Qaleralinniarnermi uumassuseqartunik piujuartitsineq tunngavigalugu atuinuq aamma aqutsineq aamma siunissami MSC-mit (Marine Stewardship Council) uppernarsaasiisaleratarsinnaanermut - aalisarnerup avatangiisinut atatillugu nalunaaqutsersorneqartarneranut – pingaaruteqassaaq. MSC-mit uppernarsaasiisarneq piffissaq ungasinnerusoq tunaartaralugu nunani tamalaani niuerfinnut naleqquttunut qaleralinnik avammut niueruteqarnerup isumannaarneqarnissaanut ilapittuutaasinnaavoq, taamaalillunilu aalisartunut inuiaqatigiinnullu kalaallinut siunissami aningaasarsiornikkut isertitassanut ajunngitsumik sunniuteqarsinnaalluni.

Pisassiissutinit niuerutigineqarsinnaasunit nammineq pigisat pillugit aqqissuussineq aamma pisassat qaffasinnerpaaffissaat

Angallatinut 6 miiterit sinnerlugit takissusilinnut pisassiissutit nammineq pigisat toqqaannartumik aamma toqqaannangitsumik pigineqarsinnaanerannut 5 %-imik qaffasinnerpaaffissatut siunnersuut Qeqertarsuup Tunuani, Uummannami aamma Upernavimmi aqutsisoqarfinni sinerissamut qanittumi qaleralinniarnermi inunnut ataasiakkaanut pisassiissutinit niuerutigineqarsinnaasunik pilersitsinermut qanittumik attuumassuteqarpoq.

Inunnut ataasiakkaanut pisassiissutinit niuerutigineqarsinnaasunik aqqissuussineq malillugu piffissamik killiliinani pisassanik nammineq pigisassanik ilaqartunik aalisartoq 6 miiterinit takinerusumik angallataatilik tunineqarsinnaavoq. Nalunaarutit siuliani taaneqartut malillugit pisassiissutinit pigisaqartut pigisaminnik niueruteqalersinnaanerit inatsisitigut ajornarunnaassaaq. Angallatinut 6 miiterimit naannerusunut killeqanngitsumik aalisarsinnaanermik periuseq akuersissut tunniunneqartoq tunngavigalugu sulit ingerlanneqarsinnaavoq.

Pisassiissutinit nammineq pigisat niuerutigineqarsinnaanermik aqqissuussineq aalisarnermik aqutsinermi niuernikkut malittarisassioriaasiuvoq, kiisalu Aalisarneq pillugu Ataatsimiititaliarsuup isumaliutersuutai 2009-meersut naapertorlugit OECD-mi (Organisation for Economic Co-operation and Development) nunat aalisarnermik aqutsinermi

² Qaleralinnik aqutsinermut pilersaarut: "Sinerissap qanittuani qaleralinniarnernup nutaamik iluarsivigineqarnissaanut periaatsit, 2011", Aalisarnermut, Piniarnermut Nunalerinermullu Naalakkersuisoqarfik. www.nanoq.gl -mi paasissutissanik ilaqartinneqarluni.

annertunerujartortumik niuernikkut malittarisassioriaaseq atugarilersimavaat: *“Tamatumunnga pissutaavoq tamatuma aalisarnermi akilersinnaassuseq pitsaanerulersissinnaanera aamma aalisarnermik inuussutissarsiummi inuiaqatigiinnilu eqqarsaatigisassat akornanni pitsaanerusumik naapertuulersissinnaaneri annertuutigut nassuerutigineqarsimammat.”* (Aalisarneq pillugu ataatsimiititaliarisuup isumaliutersuutai 2009, Namminersornerullutik Oqartussat, qupp. 23-24).

Ataatsimiititaliaq isumaqarpoq, pisassat nungunnissaasa tungaanut pisaqarneqqusaalluni aalisarnerup aamma pisassiissutinit nammineq pigisanik niuerutigineqarsinnaasunit aaqqissuussinerup aalisartup ajornannginnerusumik aalisarnerminik pilersaarusiorsinnaanera aamma pisassiissutit nammineq pigisat qularnaveeqqutigalugit angallammut aningaasaliisinnaanera pisariillisaasinnaaneralu assigiinngissutigigaat. Pisassiissutinit nammineq pigisanik niuerutigineqarsinnaasunik aaqqissuussinikkut aalisartut aalisarunnaarniartut pisassiissutit nammineq pigisat tuniniarnerisigut aningaasarsiornikkut pissarsisinnaanerat taamaalilluni aningaasaqarnikkut kaammattorneqassaaq. Ataatsimiititaliap ajunngitsutut isigaa, nammineq piunassuseq aqutigalugu angallatit amerlassusaasa ikililernissaannut periarfissiortoqarmat, taamaalilluni angallatini sinneruttuni imminut akilersinnaassuseq pitsaanerulersinneqarsinnaalluni.

Pisassiissutinit nammineq pigisanik niuerutigineqarsinnaasunik aaqqissuussinermi, assersuutigalugu pisassasat qaffasinnerpaaffilerneratigut piginneqataassutsit annertussusaat killilernerneqanngippata, pisassat nammineq pigisat piginnittunut ikittuinnarnut eqiterunnissaat aarleqqutigineqarsinnaavoq. Inatsisissatut siunnersuummi nassuiaatit malillugit pisassiissutit qaffasinnerpaaffissaat 5 %-iusoq 490 tonsit missaannik naleqarpoq. Taaneqarportaaq tunisinermi kisitsisit malillugit angallatit anginerpaat 300 tonsit ataallugit pisaqartartut. Taamaalilluni pisassiissutit qaffasinnerpaaffissaannik siunnersuut malillugu, angallatinik piginnittut pisassanik pisinermikkut inuussutissarsiumminnik annertusaanissamut ineriartortitsinissamullu suli periarfissaqarput. Taamaattumik pisassanik qaffasinnerpaaffissaliinerup periarfissaalernerana Ataatsimiititaliap tapersorsorpaa, taamaalilluni piginneqataassutsit amerlanerpaanut siaruarneqarnissaat qulakkeerneqassammat, peqatigalugulu aalisarnermi ingerlatallit ataasiakkaat aningaasaqarnikkut imminnut napatissinnaasut pilersinneqarsinnaallutik.

Pisassiissutinit nammineq pigisanik niuerutigineqarsinnaasunik aaqqissuussinikkut aqutsisoqarfiusuni pingasuni Qeqertarsuup Tunuani, Uummannami aamma Upernavimmi aalisarneq killiligaanngitsumik ingerlanneqalissaaq. Pisassiissutinit nammineq pigisanik niuerutigineqarsinnaasunik aaqqissuussineq tamakkiisumik pissarsiaqarfussappat, pisassanik paarlaassisarnerup sapinngisaq malillugu annertunerpaajusariaqarneranik oqariartuut malillugu tamanna paasinarpoq. Ilaatigut sinerissap qanittuani qaleralinniarnermut NAFO-p (Northwest Atlantic Fisheries Organization) uumassusilerinermik siunersuinerani Pinngortitaleriffimmit eqikkakkami kaammattuutigineqarpoq, sumiiffiit siuliani taasat immikkut

pisassiiffigineqartarlutik aqunneqassasut³. Pinngortitaleriffiup allaaseraattaaq, aqutsisoqarfiit pingasut tamarmik Davis Strædemit qaleraleqatigiinnut aqutsisoqarfinni ataasiakkaaniittunut Davis Strædemi qaleraleqatigiit annertussusaat, tassanngaanniit aalisakkanik pilersorneqarneq kiisalu aqutsisoqarfinni aalisarneq apeqqutaasoq⁴. Taamaalilluni qaleraleqatigiit aqutsisoqarfiit ilaanni aalisarneq aqutsisoqarfiit imminnut attuumassuteqanngillat, aqutsisoqarfiit ilaanni aalisarneq aqutsisoqarfinni allami qaleraleqassutsimut sunniuteqanngimmat.

Ataatsimiititaliap paasinninnera malillugu, aqutsisoqarfinni ataasiakkaani pingasuusuni tamani immikkoortinneqarsimapput angallatinut 6 miiteri sinnerlugu takissusilinnut inunnut ataasiakkaanut pisassiissutit niuerutigineqarsinnaasut, aamma angallatinut 6 miiterinut taakkunangaluunnit naannerusunut pisassat nungunnissaasa tungaanut pisaqarneqqusaalluni aalisarnerinnaanermut katillugit pisassiissutit. Taamaaliornikkut angallatit mikisut aamma angisuut akornanni unammilleqatigiinneq pinngitsoorneqassaaq. Aalisarnermut, Piniarnermut Nunalerinermullu Naalakkersuisoq ilisimatitsivoq, angallatinik mikisunik aamma angisuunik immikkoortitsineq sukannersumik aalajangiusimaniarneqartoq, taamaalilluni aqutsisoqarfinni ataasiakkaani assersuutigalugu angallatit angisuut angallatit mikisut pisassaannik aalisarsinnaassanatik. Tamannalu tunuliaqutaralugu Ataatsimiititaliap naatsorsuutigaa, assersuutigalugu angallatit angisuut aqutsisoqarfinni aalajangersimasumi aalisarnerat taakku pisassaat nungukkaangata aalisarneq unitsinneqartarumaartoq, tamatumali aqutsisoqarfinni tassani angallatit mikisut pisassaasa nungunnissaasa tungaanut aalisaannarsinnaanerat akornusissanngikkaa.

Aqutsisoqarfiit akimorlugit qaleraleqatigiiaani imminnut attuumassuteqanngitsunik aalisarneq killiliinani ingerlanneqalerpat, pisassiissutinik pigisaqartut tamarmik tunuarsimaanngippata aalisartut aalisarnermi tunuarsimaartut “pillarneqarnissaat” aarleqqutigineqarsinnaavoq. Tamatumunnga pissutaavoq, angallatinut 6 miiterit sinnerlugit angissusilinnut pisassiissutit pigineqartut TAC-mit procentinngorlugit taggissaammata, taamaalilluni pisassiissutit pigineqartut tonsinngorlugit pisassatut akuerineqartut naatsorsugaasut TAC apeqqutaatillugu assigiinngisitaarsinnaallutik. Pisassiissutinit nammineq pigisanik niuerutigineqarsinnaasunik aqqissuussinikkut aalisarnermik ingerlatsinerup annertussusaata annikillinissaanik kaammattuisoqarsinnaavoq, piffissarlu sivisunerusoq eqqarsaatigalugu qaleraleqatigiit amerlanerulersinneqarlutik anginerulersinneqarlutillu, taamaalilluni aalisartut ataasiakkaat tonsinngorlugit pisassat nammineq pigisaat aamma naleqarnerulissallutik. Taamaattorli Ataatsimiititaliap isumaqarpoq, kaammattuut tamanna

³ <http://www.natur.gl/gl/siunnersuineq/aalisakkanik-siunnersuineq/> 2007 – 2012. Atuarneqarpoq ulloq 14. maj 2012

⁴ <http://www.natur.gl/gl/aalisakkat-qaleruallillu/aalisakkat/qaleralik/ilulissat-uummannap-upernaviullu-eqqaanni-qalerallit/>: Atuarneqarpoq ulloq 14. maj 2012

killilerneqassasoq, aqutsisoqarfimmi ataatsimi aalisarnerup aallunneqarnera arlalinnit annertuumik ingerlanneqarpat. Piffissaq sivisunerusoq eqqarsaatigalugu aalisartunut tamanut tamanna ajortumik kinguneqarsinnaavoq, aalisarnermik aallussineq annertuallaaq tamatuma kingorna TAC-p annikinnerulerneranik kinguneqarpat. Aamma aarleqqutigineqarsinnaavoq, aalisartut annertuumik aallussinissamut aalajangiusimasartaqut aqutsisoqarfimmi allani aalisarsinnaanermikkut “akilerneqassammata”, naak TAC apparneqaraluartoq pisassiissutinit nammineq pigisat taakkuujuassaammata.

Aalisarnermut Piniarnermut Nunalerinermullu Naalakkersuisoq ilisimatitsinikuuvoq, aalisartut aqutsisoqarfimmi pingasuni sumiiffiit akimorlugit qangali aalisartarsimasut, aalisartulli angallatinik nutaanernik anginerusunik Upernavimmeersunik pigisallit pinnatik. Qangali pisinnaatitaaneq taanna sinerissamut qanittumi qaleralinniarneq pillugu nalunaarummi taamaalilluni akuerineqarpoq.

Pisassat nungunnissaasa tungaanut pisaqarneqqusaalluni aalisarnerup qangali ingerlanneqarnikuuvoq, taamaattumillu qalerallit allisarnissaat aalisartunut aningaasarsiornikkut kaammattuutaanikuunngilaq. Ataatsimiititaliaq isumaqarpoq, pisassiissutinit nammineq pigisanik niuerutigineqarsinnaasunik aaqqissuussineq siunertaanngitsumik sunniuteqarsinnaasoq, aalisartut tunuarsimaartut pisassiissutit nammineq pigisaat nalikillisinnaammata. Taamaattumik Ataatsimiititaliap Naalakkersuisut kaammattorpai, aqutsisoqarfimmi pingasuni aalisarnerup allanngoriartornera nakkutigilluassagaat, pisassiissutinillu nammineq pigisanik niuerutigineqarsinnaasunik aaqqissuussinermi siuliani taasanik sunniutinik malugisaqartoqassappat ingerlaannaq pinngitsoortitsiniarnermik iliuitsinik aallarnissaassasut, assersuutigalugu aqutsisoqarfimmi ataasiakkaani tamani pisassat qaffasinnerpaaffilernerisigut.

Pisassiissutinik nammineq pigisanik niuerutigineqarsinnaasunik aaqqissuussinermut ikaarsaariarneq

Pisassiissutinik nammineq pigisanik niueqatigiissuteqarsinnaasunik aaqqissuussineq pisassat nungunneqarnissaasa tungaanut pisaqarneqqusaalluni aalisarnermut sanillilliullugu annertuumik allannguutaavoq. Taamaattumik sinerissap qanittuani qaleralinniarnermi aqutsinermut pilersaarummi oqaatigineqarpoq, pisassiissutinit nammineq pigisanik niueruteqarsinnaasunik aaqqissuussinernup eqqunneqarnissaata tungaanut pisassiissutinik pigisat pillugit qinnuteqaatit nalilerneqarnissaannut pisortanit aqutsisoqarfimmit sulisunik

atuinissap pisariunissaa naatsorsuutigisariaqartoq⁵, tamannalu Ataatsimiititaliamit paasinniffigineqarpoq.

Ataatsimiititaliap maluginiarpaa, pisassiissutinit nammineq pigisanit niuerutigineqarsinnaasunit aaqqissuussinerup eqqunneqarnissaata piareersarneranut Naalakkersuisut annertuumik suliaqarsimasut. Naalakkersuisut naatsorsuutigisimavaat, qaleralinniarneq pillugu nalunaarut malillugu nammineq pisassaagallartut ulloq 1. marts 2012 imaluunniit tamatuma kingorna piaartumik aalisartunut nalunaarutigineqarsinnaasoq. Ataatsimiititaliap maluginiarpaa, pisassat nammineq pigisat aalisartunut 1. april 2012-imiit nalunaarutigineqarsimasut. Taamatut kinguaattooruteqartoqaraluartoq nalunaarut malillugu naammagittaalliuuteqarsinnaanermut piffissaliussaq 1. maj 2012 aalajangiusimaneqarpoq. Aalisartumut Naalakkersuisut aalajangiinerannut naammagittaalliuuteqaratarsinnaasumut naammagittaalliornissamut piffissaliussaq qaammammik ataatsimik sivikillineqarpoq, Nalunaarut malillugu nammineq pisassat nammineq pigisat ulloq 1. juni 2012 iml. piaartumik tamatuma kingorna aalajangernissaat Naalakkersuisut kissaatigimmassuk. Ataatsimiititaliap ilisimavaa, 1. juli 2012-mik piffissaliineq aalisartut amerlanerpaartaannut naammagittaalliuuteqarnissamut kissaateqanngitsut isiginiarlugit inissinneqarsimasoq, taamaalillutik aalisarneq ajornannginnerusumik pilersaarusiorsinnaammassuk. Ataatsimiititaliap ilimagisariaqarpaa, qaammatit marluk missaanni qaammatit marlut missaannik naammagittaalliornissamut piffissaliinermut aalajangiineq aallaqqaataanit Naalakkersuisunit atorsinnaasunik tunngavissaqartinneqarsimasoq, taamaattumillu sivitsorneqarsinnaasimagaluartoq. Pissutigalugu aalisartut aqutseriaatsimut nutaamut ikaarsaariarnissatik aamma piffissaqarfisariaqaraat immikkut naatsorsuutigisariaqarmat, aamma qaleralinniarnikkut siunissami isertitassanut periarfissanut pisassiissutit nammineq pigisat sinaakkutissatut aalajangiisuussammata.

Ataatsimiititaliap Aalisarnermut, Piniarnermut Nunalerinermullu Naalakkersuisumut sinerissap qanittuani qaleralinniarneq pillugu nalunaarummi naammagittaalliornermut piffissaliinermik aalajangiinissamut aalisarnermut inatsimmi naammattumik tunngavissaqarnersoq pillugu aarleqquteqarnini saqqummiunnikuuaa. Nalunaarummi § 11, imm. 1-imi naammagittaalliornermut piffissaliussatut 1. maj 2012 aalajangerneqarpoq, tamatumalu kingorna taaneqarpoq ullup taassuma kingorna naammagittaalliuutit tiguneqartut suliarineqassanngitsut.

Naalakkersuisut inatsisilerineri immikkoortortaa allakkiamini allappoq: *“Naak § 11, imm. 1-imi oqaaseq “naammagittaalliuut” atorneqaraluartoq, naammagittaalliuuteqarnissamut*

⁵ Qupp. 16, Qaleralinnik aqutsinermut pilersaarut: ”Sinerissap qanittuani qaleralinniarnep nutaamik iluarsiivigineqarnissaanut periaatsit, 2011”, Aalisarnermut, Piniarnermut Nunalerinermullu Naalakkersuisoqarfik

periarfissarpiaq tamatumani pineqanngilaq, tassaallunili akuersissummik pigisaqartup paasisutissanik allanik saqqummiussinissaminut periarfissaa, pisassiissutinik pigisanik tunniussinermut atatillugu pingaaruteqartunik. Tamanna Aalisarneq pillugu inatsimmi § 13, imm. 3 naapertorlugu piginnaatitaanermi ilaavoq,..” (Qupp. 2, Una pillugu: Sinerissap qanittuani qaleralinniarneq pillugu nalunaarummi, § 11, imm. 2, naammagittaalliornermut piffissaliussa: Inatsisilerinermi immikoortortaq, Naalakkersuisut Siulittaasuata Naalakkersuisoqarfia. Ataatsimiititaliap maluginiarpa, Naalakkersuisut isumaqartut nalunaarummi § 11, imm. 1-imi piffissaliineq aalisarnermut inatsimmi § 13, imm. 3-mi naammattumik tunngavissaqartoq. Ataatsimiititaliap taamatut paasininnermut isumminnginnissani toqqarsimavaa, piffissaliineq taaneqartoq pissutigalugu naammagittaalliuutaaratarsinnaasut pillugit Ataatsimiititaliap Inatsisartut Ombudsmand-iata suliaqarnissaa akornuserumanagu. Ataatsimiititaliap ilimagaa, Naalakkersuisut qulakkiissagaat eqqartuusertarsinnaanikkut naammagittaalliortoq isumaqatigineqassappat, tamanna pisassanik pigisaqartunut allanut, TAC-mut iml. pisassat nungunneqarnissaasa tungaannut pisaqarneqqusaalluni aalisarnermut pisassassiissutinut sunniuteqassanngitsoq.

Pisassanik pigisanik toqqaannanngitsumik pigisaqarneq

Ataatsimiititaliap naammagisimaarlugu maluginiarpa, inatsisissatut siunnersuutikkut pisassanik nammineq pigisanik toqqaannartumik aamma toqqaannanngitsumik piginnittuuneq killilerneqartoq. Ataatsimiititaliaq isumaqarpoq, ingerlatseqatigiiffiit iml. inuit pisassanik pigisanik toqqaannartumik imlt. toqqaannanngitsumik pisinermikkut inatsimmi pisassat qaffasinnerpaaffissaattut siunnersuutigineqartumik qaangiinnginnissaannut Naalakkersuisut qulakkeerinninnissaat pingaaruteqartuusoq. Pissusiviusutigut ersernerlusinnaavoq qaqugukkut pisassanik pigisanik toqqaannanngitsumik piginnittuuneq pineqarnersoq, kiisalu nalornissutaasinnaasut ataasiakkaat pilersinnaapput. Inatsimmut nassuiaatini pisassanik killiliinermut pissutsit arlallit taaneqarput.

Aalisarnermi akuersissutit pisassiissutillu pillugit nalunaarummi § 9-mi allassimavoq akuersissutit piginnittumut aalajangersimasumut ataatsimut tunniunneqartartut, kiisalu akuersissuteqarnermi pissutsit allanngorpata, matumanilu piginnittuunermut tunngasut allanngorpata, tamakku Aalisarnermut, Piniarnermut Nunalerinermullu Naalakkersuisumit akuerineqassasut. Ilanngullugu Aalisarnermut, Piniarnermut Nunalerinermullu Naalakkersuisoq ilisimatitsinikuuvoq, toqqaannanngitsumik pisassanik killiliineq aamma assersuutinik ukuninnga ilaqartoq:

Ingerlatseqatigiiffik A pisassiissutinik pigisaqarpat, aamma ingerlatseqatigiiffimmi B-mi piginneqataalluni (kisianni A-p aalajangiisuulluni ingerlatseqatigiiffik B-mi sunniuteqarsinnaanani), B-lu pisassiissutinik aamma pigisaqarluni, taamaalilluni ingerlatseqatigiiffiup A-p pisassat qaffasinnerpaaffissaat 5 %-iusut angussavai:

- a) ingerlatseqatigiiffimmi A-mi piginnittuusoq, ingerlatseqatigiiffinnit pisassanik pigisalinnit aktianik/piginneqataassutsinik pisisinnaanngippat
- b) ingerlatseqatigiiffik A ingerlatseqatigiiffinnit pisassanik pigisalinnit ingerlatseqatigiiffinnik imaluunniit aktianik/piginneqataassutsinik pisisinnaanngippat
- c) ingerlatseqatigiiffik B pisassiissutinik amerlanerusunik pisisinnaanngippat
- d) ingerlatseqatigiik B ingerlatseqatigiiffinnit pisassanik pigisalinnit ingerlatseqatigiiffinnik imaluunniit aktianik/piginneqataassutsinik pisisinnaanngippat

Ataatsimiititaliap maluginiarpaa, aalisarnermut inatsit aamma siuliani nalunaarutini taasat malillugit inuit imlt. ingerlatseqatigiiffiit aktianik pisisarnerat tunisisarnerallu malitsissallugit ajornakusoorsinnaasoq, ilimagaluguli piviusut pillugit Naalakkersuisut ilisimatitseriaatsimik aamma nalunaaruseqariaatsimik pilersitsissasut, tamatumanilu inuit imlt. ingerlatseqatigiiffiit pisassat pigisanik toqqaannangitsumik pigisaqarnerat allanngorpat Naalakkersuisut ilisimatinneqarnissaat qulakkeerneqassasoq. Tamanna naatsorsuutigisariaqarpoq pisassanik pigisanik toqqaannartumik piginnittuunermut atatillugu nakkutilleeriaatsimut akuerseriaatsimullu atuuttumut atatillugu.

Siunnersuutip aningaasaqarnikkut aqutsinikkullu kingunerisassai

Siunnersuutip piviusunngortinnerani aningaasaqarnikkut aqutsinikkullu kingunerisassai siunnersuutip nalinginnaasumik nassuiaatitaani allassimapput. Taaneqarpoq siunnersuut piffissaq ungasinnerusoq eqqarsaatigalugu akuersissusiortarnermik Naalakkersuisut aqutsinerisa annikilleriarneranik nassataqassasoq. Tamanna pillugu Ataatsimiititaliaq oqaaseqarnissamat pissutissaqarpoq, pisassiissutinik nammineq pigisanik toqqaannangitsumik pigisaqarnermik nakkutilliineq Naalakkersuisut aqutsineranni sulisutigut killilimmik atuiffiusinnaammat.

Siunnersuutip nassuiaatitaani nalinginnaasuni taaneqarpoq, siunnersuut pisortanut aningaasaqarnikkut ajortumik nassattaqassanngitsoq. Inuussutissarsiummut aningaasaqarnikkut sunniutaasussanut atatillugu Naalakkersuisut taavaat, pisassiissutit 5 %-imik qummut killilerneqarnerat akilersinnaasumik ingerlatsisinnaaneq eqqarsaatigalugu naleqqulluartutut isigineqartoq.

Tunngaviliussat saqqummiunneqartut malillugit Ataatsimiititaliaq isumaqarpoq siunnersuutip aningaasaqarnermut kingunerisassaanut atatillugu Naalakkersuisut naliliinerannit allatut naliliinissaq pissutissaqanngitsoq. Taamaalilluni ataatsimiititaliap tatigaa, apeqqut taanna Naalakkersuisut sukumiisumik misissorsimagaat, aamma aningaasatigut kingunerisinnaasat allat pilersinnaanngitsut. Akerlinganilli naatsorsuutiginnisamik siunertaanngitsunik allatigut pisariaqanngitsumik sunniutissat malunnarsissagaluarpata, Ataatsimiititaliap qularinngilaa

Naalakkersuisut kinguarsaanertaqanngitsumik suliniutinik allanik annikilliliinikkut imaluunniit inatsisitigut iluarsiinikkut iluarsissuteqarniassasut.

Ataatsimiititaliap inassutai

Ataatsimiititaliami amerlanerussuteqartut Inuit Ataqtigiiinneersut aamma Demokraatineersup siunnersuut akuerineqassasoq inassutigaa.

Ataatsimiititaliami ikinnerussuteqartut Siumumeersut siunnersuut pillugu ima oqaaseqassapput:

“Inatsisartut aalisarnej pillugu inatsisaata allanngortinneqarnera pillugu immikkoortoq UPA 2012/43 sinerissami qanittumi qaleralinniarnermi pisassiisutit qummut killissaat pillugu Siumut ikinnerussuteqarluni imaattumik oqaaseqassaaq.

Paatsoortoqannginnissaa pillugu aallarniutigalugu Siumumit erseqqissaatigissavarput qaleralittassanik aalisartut niuerutigineqarsinnaasunik pisassinneqartalernissaat Siumumit akerlerinnginnatsigu.

Siumumilli isumaqarpugut qaleralittassat niuerutigineqarsinnaanngorlugit maannakkut aaqqissuussineq pipallataavallaartoq peqqissaarulluinnarlugulu suliarineqartariaqaraluartoq. Qaleralinniarnermi pissutsinut sungiusimasanut taamatut annertutigisumik allanngineq pisussaasoq uggornarluinnartumik paasisitsiniaaneq amigarluinnartumik ingerlanneqarsimavoq. Allaallumi qaleralinniarfiusuni pineqartuni illoqarfiit nunaqarfiillu ilaannamineerarsui paasisitsiniaalluni tikinneqarsimallutik.

Qaammarsaaneq imatut amigartigisumik ingerlanneqarsimavoq allaat aalisartorpassuit pisassiisutit tunniunneqartut qanoq naleqartigisinnaanersut suli iluamik paasisimanagu, qanorlu annertutigisorujussuarmik iluaqutigalugit angallatiminnik nutarsaasinnaanermut atorsinnaagaluartut.

Tamanna ilaatigut uppersarsineqarpoq Aalisarnermut Naalakkersuisup arlaleriarluni oqaatigimmagu aalisartunngooq angallataatillit arlallit aalisariutiminnik arlaatigut ajornartorsiuteqartut ujarsimammassuk umiatsiaararsortutut ingerlanissartik, angallateqarneq aallaavigalugu pisassinneqarnissaq qimallugu. Aalisartut pineqartut erseqqissumik paasisimagaluarnerpaat pisassiissutaasinnaasut naaggaakkat qanoq naleqarsinnaatigineri? Qanorlu annertutigisumik angallatiminnut nutarterinissamut iluaqutaasimasinnaagaluartut? Siumumi qularinngilluinnarparput aalisartut pineqartut iluamik qaammarsarneqarsimasuugunik pisassiissutinik tunineqarnissaq toqqarsimassagaluaaraat. Qaleralittassanik niuerutigineqarsinnaasunik pisassiisalernermi aaqqissuussinermi maannakkut nalornineq imatut angitigaaq ilumut allaat erseqqissumik oqaatigineqarsinnaananiluunniit pisassanik tuniniaasinnaaneq maannakkut ajornarunnaareersimanersaq, imaluunniit nutaamik aaqqissuussinerup atuutilerfissaatut siunniuffigineqartumi 1. juli 2012 aatsaat atuutilissanersaq.

Aalisarnermut Naalakkersuisoq Aalisarnermut Ataatsimiititaliamik isumasioqatigiinnermi allaganngorlugu oqaatsitigullu erseqqissumik nalunaaruteqaraluarpoq aalisartut qaleralittassinneqarsimasut maannakkut pisassaminnik tunisisinnaalereersut. Siumumit takusinnaangilarput qanga tamanna nalunaarutigineqarsimanersoq, taamaattumik Naalakkersuisunut apeqqutigissavarput qanga tamanna nalunaarutigineqarsimanersoq, taamatutaaq apeqqutigissallugu nalunaaruteqarsimappata inatsit suna, imaluunniit Inatsisartunit pisinnaatitsissut suna tunngavigalugu taamatut nalunaaruteqarsimanersut? Aalisarnermut inatsisip allanngortinneqarnissaanut Siumumit maannakkut akerliunitsinnut ilaatigut aamma patsisigaarput maannakkut nutaamik aaqqissuussinerup kingunerisaanik inuusuttorpassuit meeraagamilli aalisaqataajuarsimasut namminersorlutik qaleralinniarnermik inuutissarsiuteqalernissaminnut mattulluinnarneqassammata!


Akerlianillu inuit ataasiakkaat aalisartuunngitsut, aalisartuunngisaannarnikut, aningaasatigut periarfissagissaarnerit, selskabillu assigiinngitsut, akissaqarnertik sakkugalugu ajornaquteqannguannigsumik aalisartuinnik aalisartuinnigortussaagaluanillu ingiaallutik pisassat 5 %-ia pallillugu pigilerlugu ”aalisartorsuanngorlutik” qaleralinniartunngorsinnaalernissaannik periarfissinneqarput.

Aalisartut piniartullu kattuffiat KNAPK Inatsisartunut ilaasortanut ilungersorluni saaffiginnippoq inatsisissami pineqartumi nalornissutit qulaajagassallu imatut amerlatigimmata kissaatigalugu inatsimmik allannguineq aatsaat atuutilissasoq 1. januar 2014. Ukiorlu 2013 aaqqissuusseqqinnermi misileraaffittut iluarsartuussiffittullu atorineqassasoq.

Inatsisartut aalisarnek pillugu inatsisaata allanngortinneqarnera pillugu Inatsisartut inatsisissaattut siunnersuummik sammisatsinni apeqqutit pingaarutillit qulaajagassat suli amerlaqimmata, aamma minnerunngitsumik **pingaarnarpaatullu** pipallatamik sulinitigut kukkusumik aalajangiinitta kingunerisaanik ilaqutariippassuit inuuniarnerminni qaleralinniarnermik tunngavillit inuuneranni ajorluinnartumik eqqorneqannginnissaat pingaartilluinnaratsigu Siumumit siunnersuutigivarput inatsisissatut siunnersuutip pingajussaaneernissaa Inatsisartut ukiamut ataatsimiinnissaanut kinguartinneqassasoq, kisiannili tamanna amerlanerussuteqartunit akueriumaneqanngilaq.”

Taamaattumik **Ataatsimiititaliami ikinnerussuteqartut** siuliani taaneqartut maanna pissutsit tunngavigalugit siunnersuut **itigartinneqassasoq inassutigaat.**

Taamatut oqaaseqarluni isumaliutissiisummilu allassimasutut paasinnilluni Ataatsimiititaliap siunnersuut aappasaaniigassanngortippaa.




Aqqaluaq B. Egede,
Siulittaasoq


Finn Karlsen


Hans Aronsen




Hans Enoksen



Karl Lyberth



Michael Rosing



Peter Lyberth



INATSIARTUT

ILANNGUSSAQ

1

Aalisarnermut, Piniarnermut Nunalerinermullu Naalakkersuisoq
Ane Hansen
/MAANI

Ulloq 11. maj 2012
Sags.nr.: 01.36.01.04-00012

**Isumasioqatigiinnissamut pingasunngornermi ulloq 16. maj 2012 nal. 09.00-10.30
Aalisarnermut, Piniarnermut Nunalerinermullu Naalakkersuisumut Ataatsimiittarfik 2-mut
aggersaaneq**

Aalisarnermut, Piniarnermut Nunalerinermullu Ataatsimiititaliaq maanna Inatsisartut aalisarneq pillugu inatsisaata allangortinneqarnera pillugu inatsisartut inatsisaattut siunnersuut suliaralugu ingerlappaat. Siunnersuutikkut inuit imaluunniit ingerlatseqatigiiffiit sinerissap qanittuani qaleralinniartut pisassat tamarmiusut annertunerpaamik 5 %-iinik pigisaqarsinnaanerit pillugu maleruagassamik ilanngussisoqarpoq. Naalakkersuisut saqqummiussisutaat malillugu siunnersuut sinerissap qanittuani angallatinut 6 miiterimik takinerusunut pisassiissutinik nammineq pigisanik niuerutigineqarsinnaasunik pilersitsiniarnermut ataqatigiissinneqassaaq.

Siunnersuutip siullermeerneqarnerani apeqqutinik siunnersuummut attuumasunik Naalakkersuisunut saqqummiussisoqarpoq, ajornartorsiutillu arlallit tikkuarneqarlutik. Inatsisissatut siunnersuutip suliarinerani apeqqutit uku apeqqutigissallugit Ataatsimiititaliaq pissutissaqarpoq:

1) Ukiumut pisassiisutit ukiup naanera sioqqullugu tamarmik aalisarneqarsimappata aalisartunut 6 miiterimit naannerusunik angallataatilinnut aalisarnissamut periarfissat suut Aalisarnermut, Nunalerinermut Piniarnermullu Naalakkersuisup tikkuarsinnaavai?

2) Aalisartunut ukiuni 2009-mi, 2010-mi aamma 2011-imi angallatiminnik aserortoornermik nalaataqarsimasunut, imaluunniit aalisarnerlussimasunut, tamannalu tunuliaqutaralugu pisassiissutinut pigisanut aalisartumit naammangitsuunerarneqartutut isumaqarfiginnittunut, aaqqiissutaasinnaasut suut eqqarsaataasinnaappat? Sinerissap qanittuani qaleralinniarneq pillugu Namminersorlutik Oqartussat nalunaarutaat nr. 2, 2. februar 2012-meersumi § 10, imm. 3 tunngavigineqartutut apeqqut paasineqassaaq.

3) Aalisarnermut, Piniarnermut Nunalerinermullu Naalakkersuisumik ulloq 16. april paasissutissiinermik ataatsimeeqateqarnermi oqaatigisassatut tunngavissiaq malillugu aalisartunut ataasiakkaanut 6 miiterimik takinerusunik angallataatilinnut 1. april 2012 pisassiissutit pigisat nalunaarutigineqarput. Sinerissap qanittuani qaleralinniarneq pillugu Namminersorlutik Oqartussat nalunaarutaat nr. 2, 2. februar 2012-meersumi § 11, imm. 1 naaperforlugu naammagittaaliuuteqarsinnaanermut 1. maj 2012 piffissaliunneqarpoq. Ataatsimiititaliaq isumaqarpoq, naammagittaalliornermut qaammat ataaseq piffissaliutissallugu sivikippallaarujussuartoq, pisassiissutit pigisat agguaneqarnerat ukiuni amerlasuuni siunissami isertitaqarnissamut periarfissanut pingaaruteqartussaammata. Aalisarnermut, Piniarnermut Nunalerinermullu Naalakkersuisoq Ataatsimiititaliami ilaasortatuulli isumaqarpa



INATSISARTUT

naammagittaalliornermut piffissaliussap sivitsorneqarnissaa iluaqutaassasoq, aamma assersuutigalugu qaammatinik marlunnik sivitsuineq aqunneqarsinnaava?

4) Sinerissap qanittuani qalerallinniarneq pillugu Namminersorlutik Oqartussat nalunaarutaanni nr. 2-mi, 2012-meersumi naammagittaalliornermut piffissaliinermik aalajangiisinaanermut inatsisit sorleq tungavissaasoq Aalisarnermut, Piniarnermut Nunalerinermullu Naalakkersuisumit isumaqarfigineqarpa? Aalisarneq pillugu inatsimmi naammattumik inatsisitigut tungavissiorneq Aalisarnermut, Piniarnermut Nunalerinermullu Naalakkersuisoq inatsisissatut allannguutissatut siunnersuummi saqqummiinialuni eqqarsaateqarpa? Ataatsimiititaliap paasinninnera malillugu, naammagittaalliorsinnaaneq aamma naammagittaalliornermi piffissaliineq pillugu maleruagassanik aalajangersaasinnaanermut Aalisarneq pillugu inatsit inatsisillu taassuma killissarititai malillugit Naalakkersuisut Inatsisartunit piginnaatinneqarsimangillat.

5) Inunnut imaluunniit ingerlatseqatigiiffinnut sinerissap qanittuani qalerallinniarnermik ingerlatsilerusuttunut pisassiissutinik, akuersissutinik, angallatinik il.il. pissarserusuttunut atatillugu pissutsit suut aalajangiisuuppat?

6) Pisassiissutinik nammineq pigisanik niuerutigineqarsinnaasunik pilersitsinikkut aqutsisoqarfiit akimorlugit aalisarneq killiliinani ingerlanneqarsinnaavoq, naak aqutsisoqarfinni taakkunani qaleraleqatigiiaat assigiinngitsut pingasuugaluartut aamma imminnut attuumassuteqanngikkaluartut. Aalisarnermut, Piniarnermut, Nunalerinermullu Naalakkersuisoq siunnersuutip siullermæerneqarnerani Demokraatit oqaaseqartartuatuulli isumaqarpa, pisassiissutinik nammineq pigisanik niuerutigineqarsinnaasunik pilersitsinermi aaqqissuussineq sanngeequteqartoq, aamma tamanna qanoq iluaquserneqarsinnaava?

Demokraatit oqaaseqartartuata saqqummiussaa malillugu aalisartut aalisarnermini tunuarsimaartutut pissuseqaratarsinnaasut pillarneqassapput, aalisartut allat annertuumik aalisarnissartik aalajangiusimasappassuk, taakkua pisassiissutit pigisaasa nalingat annikillissammat. Tamatumunnga tunulliaqutarineqarpoq Aalisarnermut, Piniarnermut Nunalerinermullu Naalakkersuisup Uummannami aqutsisoqarfinni 2012-imut TAC-tut 6.000 tons-it aalajangersimammagit, naak biologinik siunnersuinerit 5.000 tons-iugaluartut kiisalu Naalakkersuisut immikkoortoq 125-imut akissutaanni oqaatigineqarmat, ukiuni kingullerni Diskobugtimi qalerallit angissusaat agguaqatigiissillugu malunnaatilimmik appararsimasoq.

7) Ataatsimiititaliap naammagisimaarlugu malugaa, pisassat nammineq pigisat toqqaannartumik aamma toqqaannangitsumik pigineqartartussaasut Naalakkersuisut inatsisissatut siunnersuutikkut aallarniiniarmata. Inatsimmi nassuiaatit malillugit assersuummi 1-imi tamanna takutinneqarpoq, ingerlatseqatigiiffik AA pisassiissutit ilaannik pigisalik aamma ingerlatseqatigiiffimmik BB-mik 25 %-imik piginneqataasoq; BB-lu aqutsisoqarfinni pisassat ilaannik 10 %-imik pigisaqarluni, taava ingerlatseqatigiiffiup AA-p pisassiissutinut pigisaanut 2,5 procentpointit ilassutigineqassapput. Ataatsimiititaliap qularutiginngilaa, ingerlatseqatigiiffiup AA-p taamaalilluni pisassat qaffasinnerpaaffissaat 5 %-iusoq anguppagu, ingerlatseqatigiiffik pisassanik amerlanerusunik pisinissaminut periarfissaarutissasoq. Tamanna Aalisarneq pillugu inatsimmi § 15, imm. 2 atorlugu atortinneqassasoq naatsorsuutigineqarpoq, tassani allassimammatt, pisassiissutinik pigisanik tunniussineq Naalakkersuisunit akuerineqassasoq. Tamanna aamma ima paasisariaqarpa, pisassiissutit qaffasinnerpaanissaanik killiliinermi assersuutit uku aamma ilaasut:

a) Ingerlatseqatigiiffimmi AA-mi piginnittuusoq ingerlatseqatigiiffinnit pisassiissutinik nammineq pigisalinnit aktianik/piginneqataassutisnik pisinissaminut periarfissaqanngitsoq?



INATSISARTUT

b) Ingerlatseqatigiiffimmi AA-mi piginnittuusooq ingerlatseqatigiiffinnit pisassiissutinik nammineq pigisalinnit ingerlatseqatigiiffinnik iml. aktianik/piginneqataassutsinik pisinissaminut periarfissaqanngitsooq?

c) Ingerlatseqatigiiffik BB (ingerlatseqatigiiffiup AA-p aalajangiisuulluni sunniuteqarfigisinnaanngisaa) pisassiissutinik amerlanerusunik pisinissaminut periarfissaqanngitsooq?

d) Ingerlatseqatigiiffik BB, ingerlatseqatigiiffimmit AA-mit 25 %-imik piginneqataaffigineqartoq, ingerlatseqatigiiffinnit pisassanik pigisalinnit ingerlatseqatigiiffinnik iml. aktianik/piginneqataassutsinik pisinissaminut periarfissaqanngitsooq?

Siuliani assersuutit pisassiissutit qaffasinnerpaaffissaannut ilaatinneqarpata, taava tamatuma piviusutigut qanoq atortinneqarnissaa Naalakkersuisunit eqqarsaatigineqarpa, ingerlatseqatigiiffinni aktianik/ingerlatseqatigiiffinnik pisineq tunisinerlu Aalisarneq pillugu inatsimmi § 15, imm. 2-mi ilaatinneqarnera naatsorsuutigineqarsinnaanngimmat?

Ataatsimiititaliap Naalakkersuisumik apersuinerani sammisat pillugit oqaloqatigiittoqarnissaa aammalu itisiliilluni apeqquteqartoqartarnissaaq naatsorsuutigineqassaaq.

Naalakkersuisumik apersuinnermut atatillugu oqaasissat allattorsimaffiannik tigusaqarnissani Aalisarnermut, Piniarnermut Nunalerinermullu Ataatsimiititaliap kissaatigaa. Oqaasissat allattorsimaffiat kingusinnerpaamik Naalakkersuisumik apersuinerup kinguninngua kalaallisut danskisullu qarasaasiakkut uunga nassiuteqquneqarpoq: julie@inatsisartut.gl.

Oqaasissat allattorsimaffiat nassarneqarpat taassuma danskisuaa Naalakkersuisumik apersuinerup aallartinnerani ataatsimiititaliap oqalutnaanun tunniuteqquneqarpoq.

Inussiarnersumik inuulluaqqusillunga

Aqqaluaq B. Egede
Aqqaluaq B. Egede

Ataatsimiititaliami Siulittaasoq,
Aalisarnermut, Piniarnermut Nunalerinermullu ataatsimiititaliaq



Inatsisartunut Ilaasortaq, Aqqaluaq B. Egede
Ataatsimiititaliamut Siulittaasoq,
Aalisarnermut, Piniarnermut Nunalerinermullu Ataatsimiititaliaq
/MAANI

**Isumasioqatigiinnissamut ataatsimiititaliaq aggersaananut atatillugu
oqaaseqaatit**

11. maj 2012
Sagsnr. 2012-061106
Dok. Nr. 905608

Postboks 289
3900 Nuuk
Tlf. (+299) 34 50 00
Fax (+299) 34 63 55
E-mail: apnn@nanoq.gl
www.nanoq.gl

Ulloq 16. maj 2012 isumasioqatigiinnissamut ataatsimiititaliaq aggersaananut
atatillugu akissutikka ataaniipput:

Apeqquut 1.

*"Ukiumut pisassiisutit ukiup naanera sioqqullugu tamarnik
aalisarneqarsimappata aalisartunut 6 miiterimit naannerusunik angallataatilinnut
aalisarnissamut periarfissat suut Aalisarnermut, Piniarnermut Nunalerinermullu
Naalakkersuisup tikkuarsinnaavai?"*

Apeqquummut 1-imut akissut.

Qaleralittassiisutit nungunneqaraangata aalisarneq unitsinneqassaaq.
Taassuma kingorna aalisariutaatillit 6 meterit ataallugit angissusillit
angallataatillit aalisakkanik allanik aalisarsinnaapput, tassunga ilanngullugit
saarullit, suluppaakkat, qeeqqat aamma imminguit. Ukiumi kingusinnerusukku
sumiiffiit ilaanni piniakkanik assigisaannillu piniarnissamut aamma
periarfissaqarpoq, assersuutigalugu Uummannap eqqaani qilalukkat qernertanit
piniarsinnaalutik.

Apeqquut 2.

*"Aalisartunut ukiuni 2009-mi, 2010-mi aamma 2011-imi angallatiminnik
aserortoornermik nalaataqarsimasunut, imaluunniit aalisarnerlussimasunut,
tamannalu tunuliaqutaralugu pisassiissutinut pigisanut aalisartumit
naammangitsuunerarneqartutut isumaqarfiginnittunut, aaqqiissutaasinnaasut
suut eqqarsaataasinnaappat? Sinerissap qanittuani qaleralinniarneq pillugu
Namminersorlutik Oqartussat nalunaarutaat nr. 2, 2. februar 2012-meersumi §
10, imm. 3 tunngavigineqartutut apeqquut paasineqassaaq."*

Apeqquut 2-mut akissut

Naammagittaalliutinik tiguneqarsimasunik misissuineq nalilersuinerlu
atorfilittannit aallartinneqareerpoq. Sulineq taanna julimi imaluunniit julip

qaangilaarnerani naammassineqassaaq, qaleralinniarneq pillugu nalunaarummi tamanna aamma allanneqarsimavoq.

Aalisartut ukiuni 2009-mi, 2010-mi 2011-milu angallatiminnik aserortoorsimasut kiisalu aalisartut ukiuni taakkunani aalisarnerliorsimasut, tamannalu pissutigalugu isumaqartut pisassiissutinit pigisat tunniunneqartut naammangitsut, angallatinut ataasiakkaanut pisassiissutinit pigisanik inaarutaasumik aalajangeeqinnissamut atatillugu oqallisigineqassapput.

Tassunga atatillugu ataatsimiititaliortoqarpoq, tassanilu GA aamma KNAPK ilaasortaapput, ataatsimiititaliallu naammagittaalliutit tamaasa misissussavai, taassumalu kingorna pisassiissutinit pigisanik tunniunneqartunik aaqqiissuteqarsinnaaneq periarfissaavoq.

Apeqqut 3.

"Aalisarnermut, Piniarnermut Nunalerinermullu Naalackersuisumik ulloq 16. april paasissutissiinermik ataatsimeeqateqarnermi oqaatigisassatut tunngavissiaq malillugu aalisartunut ataasiakkaanut 6 miiterimik takinerusumik angallataatilinnut 1. april 2012 pisassiissutit pigisat nalunaarutigineqarput. Sinerissap qanittuani qaleralinniarneq pillugu Namminersorlutik Oqartussat nalunaarutaat nr. 2, 2. februar 2012-meersumi § 11, imm. 1 naapertorlugu naammagittaaliuteqarsinnaanermut 1. maj 2012 piffissaliunneqarpoq. Ataatsimiititaliaq isumaqarpoq, naammagittaalliornermut qaammat ataaseq piffissaliutissallugu sivikippallaarujussuartoq, pisassiissutit pigisat agguaneqarnerat ukiuni amerlasuuni siunissami isertitaqarnissamut periarfissanut pingaaruteqartussaammata. Aalisarnermut, Piniarnermut Nunalerinermullu Naalackersuisoq Ataatsimiititaliami ilaasortatuulli isumaqarpa naammagittaalliornermut piffissaliussap sivitsorneqarnissaa iluaqutaassasoq, aamma assersuutigalugu qaammatinik marlunnik sivitsuineq aqunneqarsinnaava?"

Apeqqut 4.

"Sinerissap qanittuani qaleralinniarneq pillugu Namminersorlutik Oqartussat nalunaarutaanni nr. 2-mi, 2012-meersumi naammagittaalliornermut piffissaliinermik aalajangiisinnaanermut inatsisit sorleq tunngavissaasoq Aalisarnermut, Piniarnermut Nunalerinermullu Naalackersuisumit isumaqarfigineqarpa? Aalisarneq pillugu inatsimmi naammattumik inatsisitigut tunngavissioinnissamut Aalisarnermut, Piniarnermut Nunalerinermullu Naalackersuisoq inatsisissatut allannguutissatut siunnersuummi saqqummiinialuni eqqarsaateqarpa? Ataatsimiititaliap paasinninnera malillugu, naammagittaalliorsinnaaneq aamma naammagittaalliornermi piffissaliineq pillugu maleruagassanik aalajangersaasinnaanermut Aalisarneq pillugu inatsit inatsisillu taassuma killissarititai malillugit Naalackersuisut Inatsisartunit piginnaatinneqarsimangillat."

Apeqqutinut 3-mut aamma 4-mut akissut.

Apeqquitiit 3 aamma 4 imminnut atammata ataatsikkut akineqarput.

Apeqqutininut taakkununga atatillugu aallaqqaasiullugu ajuusaarutigissavara nalunaarummi nr. 2, 2. februar 2012-imeersumi § 11, imm. 1 ernumatitsilersimammat.

§ 11 imm. 1 sananeqarpoq una siunertaralugu, pisassiissutinit taakkuninnga pissarsisut periarfissinniarlugit, paasissutissanik amerlanerusunik, § 11, imm. 2 malillugu tuniussisinnaangorlugit. Taamaasilluni aaliangersagaq toqqaannartumik naammagittaalliornissamut attuumassuteqanngilaq.

Taamaalillunga ilisimatitsissutigisinnaavara innuttaasut ingerlatsiviup aaliangersagaanut naammagittaalliornissaminnut pisinnaatitaaffiat § 11, imm. 1-imut attuumassuteqanngimmaat. Pisassiissutinit pigisanik piginnittut taamaalillutik sinerissap qanittuani qaleralinniarneq pillugu nalunaarummi pisinnaatitsineq malillugu aalajangikkanik maalaaruteqarsinnaatitaapput.

Inatsisinik atortitsinermut allaffeqarfiup allakkiaa 2. maj 2012-imeersoq, akissummut uunga ilanngunneqartoq innersuussutigissavara, tassa § 11, imm. 1-imi naalackersuisoqarfiup siunertaa aamma aalisarneq pillugu inatsit malillugu Naalackersuisut pisinnaatitaaffii allakkiami nassuiarneqarmata.

Qulaani taaneqartut tunngavigalugit piffissap maalaarutininik suliarinniffiusartup sivitsornissaanut pissutissaqanngilanga.

Apeqquut 5.

"Inunnut imaluunniit ingerlatseqatigiiffinnut sinerissap qanittuani qaleralinniarnermik ingerlatsilerusuttunut pisassiissutininik, akuersissutininik, angallatinik il.il. pissarserusuttunut atatillugu pissutsit suut aalajangiisuuppat?"

Apeqquummut 5-imut akissut.

Inuit suliffeqarfiillu maannamut aalisarsinnaanermik akuersissummik pigisaqarnikuunngitsut sinerissap qanittuani qaleralinnialersinnaanermut marlunnik periarfissaqarput.

Inuit suliffeqarfiilluunniit taakku piginneqataalersinnaapput – tassa aalisartunik sinerissap qanittuani qaleralinniarnermik ingerlatsisunik aalisariutaatileqatigiiffimmi suliffeqarfimmiluunniit piginneqataalersinnaapput. Inuit suliffeqarfiilluunniit taakku aammattaaq aalisartunit pisassiissutinit pigisanik tunisinissamik aalisarunnaarnissamillu siunertaqartunit pisisinnaapput.

Apeqquut 6.

"Pisassiissutininik nammineq pigisanik niuerutigineqarsinnaasunik pilersitsinikkut aqutsisoqarfiit akimorlugit aalisarneq killilliinani ingerlanneqarsinnaavoq, naak aqutsisoqarfinni taakkunani qaleraleqatigiiaat assigiinngitsut pingasuugaluartut aamma imminnut attuumassuteqanngikkaluartut. Aalisarnermut, Piniarnermut,

Nunalerinermullu Naalackersuisoq siunnersuutip siullermeerneqarnerani Demokraatit oqaaseqartartuatuulli isumaqarpa, pisassiissutinik nammineq pigisanik niuerutigineqarsinnaasunik pilersitsinermi aaqqissuussineq sanngeequteqartoq, aamma tamanna qanoq iluaquserneqarsinnaava?

Demokraatit oqaaseqartartuata saqqummiussaa malillugu aalisartut aalisarnerminni tunuarsimaartutut pissuseqaratarsinnaasut pillarneqassapput, aalisartut allat annertuumik aalisarnissartik aalajangiusimasappassuk, taakkua pisassiissutit pigisaasa nalingat annikillissammat. Tamatumunnga tunuliaqutarineqarpoq Aalisarnermut, Piniarnermut Nunalerinermullu Naalackersuisup Ummannami aqutsisoqarfimmi 2012-imut TAC-tut 6.000 tons-it aalajangersimammagit, naak biologinit siunnersuinerit 5.000 tons-iugaluartut kiisalu Naalackersuisut immikkoortoq 125-imut akissutaanni oqaatigineqarmat, ukiuni kingullerni Diskobugtimi qalerallit angissusaat agguaqatigiissillugu malunnaatilimmik appariarsimasoq."

Apeqqummut 6-imut akissut.

Isumaqarpunga aqutsiveqarfinni pingasuni tamani – tassa aqutsiveqarfinni Upernavimmi, Ummannami aamma Qeqertarsuup Tunuani - angallatit 6 meterimit anginerusut atorlugit qalerallinniarinnaanermut akuersissumik atuisinnaanermut periarfissaq aaqqissuussaannikkut sanngiissuteqanngitsaq.

Aqutsiveqarfinni taakkunani pingasuusuni aalisartut aqutsiveqarfinni taakkunani pingasuni qangalili aalisartarput, aalisariutit anginerit nutaanerusut Upernavimmeersut eqqaassanngikkaanni. Oqaluttuarisaanermi pisinnaatitaaffiup akuerineqarnissaa tamanna tunngavigalugu naleqquttut Naalackersuisut isigaat, tassa pisinnaatitaaffik tamanna atuullualernikummat.

Demokraatit oqaaseqartuata isumaanit akerliusumik isumaqarpunga aqutsiveqarfinni pingasuni tamani aalisarsinnaanermut periarfissaqarneq naammaginaruusooq, tassa aalajangersagaq pineqartoq atorlugu aalisarnerup annertussusia siaruarneqarmat, taamaalillunilu aqutsiveqarfimmi ataatsimi qaleraleqassutsip ajutooriataarsinnaanera millisinneqarmat. Eqqaamaneqassaaq aqutsiveqarfimmi ataatsimi angallatinut 6 meterit ataallugit angissusilinnut pisassiissutit imaluunniit angallatinut anginerusunut pisassiissutit tamakkerlugit aalisarneqarpata, aalisarneq unitsinneqartussaasoq.

Apeqqut 7.

"Ataatsimiititaliap naammagisimaarlugu malugaa, pisassat nammineq pigisat toqqaannartumik aamma toqqaannangitsumik pigineqartartussaasut Naalackersuisut inatsisissatut siunnersuutikkut aallamiiniarmata. Inatsimmi nassuiaatit malillugit assersuummi 1-imi tamanna takutinneqarpoq, ingerlatseqatigiiffik AA pisassiissutit ilaannik pigisalik aamma ingerlatseqatigiiffimmik BB-mik 25 %-imik piginneqataasoq, BB-lu aqutsisoqarfimmi pisassat ilaannik 10 %-imik pigisaqarluni, taava ingerlatseqatigiiffiup AA-p pisassiissutinut pigisaanut 2,5 procentpointit

ilassutigineqassapput. Ataatsimiititaliap qularutiginnilaa, ingerlatseqatigiiffiup AA-p taamaalilluni pisassat qaffasinnerpaaffissaat 5 %-iusoq anguppagu, ingerlatseqatigiiffik pisassanik amerlanerusunik pisinissaminut periarfissaarutissasoq. Tamanna Aalisarneq pillugu inatsimmi § 15, imm. 2 atorlugu atortinneqassasoq naatsorsuutigineqarpoq, tassani allassimammat, pisassiissutinik pigisanik tunniussineq Naalakkersuisunit akuerineqassasoq. Tamanna aamma ima paasisariaqarpa, pisassiissutit qaffasinnerpaanissaanik killiliinermi assersuutit uku aamma ilaasut:

a) Ingerlatseqatigiiffimmi AA-mi piginnittuusoq ingerlatseqatigiiffinnit pisassiissutinik nammineq pigisalinnit aktianik/piginneqataassutsinik pisinissaminut periarfissaqanngitsaq?

b) Ingerlatseqatigiiffimmi AA-mi piginnittuusoq ingerlatseqatigiiffinnit pisassiissutinik nammineq pigisalinnit ingerlatseqatigiiffinnik iml. aktianik/piginneqataassutsinik pisinissaminut periarfissaqanngitsaq?

c) Ingerlatseqatigiiffik BB (ingerlatseqatigiiffiup AA-p aalajangiisuulluni sunniuteqarfigisinnaanngisaa) pisassiissutinik amerlanerusunik pisinissaminut periarfissaqanngitsaq?

d) Ingerlatseqatigiiffik BB, ingerlatseqatigiiffimmit AA-mit 25 %-imik piginneqataaffigineqartoq, ingerlatseqatigiiffinnit pisassanik pigisalinnit ingerlatseqatigiiffinnik iml. aktianik/piginneqataassutsinik pisinissaminut periarfissaqanngitsaq?


Siuliani assersuutit pisassiissutit qaffasinnerpaaffissaannut ilaatinneqarpata, taava tamatuma piviusutigut qanoq atortinneqarnissaa Naalakkersuisunit eqqarsaatigineqarpa, ingerlatseqatigiiffinni aktianik/ingerlatseqatigiiffinnik pisineq tunisinerlu Aalisarneq pillugu inatsimmi § 15, imm. 2-mi ilaatinneqarnera naatsorsuutigineqarsinnaanngimmat?"

Apeqqummut 7-imut akissut.

Assersuutit qulaani taaneqartut pisassiissutit annertunerpaaffissaqarnissaannut ilaapput, Naalakkersuisullu eqqarsaatigaat Aalisarsinnaanermut akuersissutit pisassiissutillu pillugit Namminersorlutik Oqartussat nalunaarutaat nr. 1, 2. februar 2012-meersumi § 9 innersuussutigalugu tamanna atuutitsinniarlugu, tassani ilaqqavoq:

"§ 9. Aalisarsinnaanermut akuersissutit piginnittumut aalajangersimasumut ataatsimut tunniunneqartarput aammalu angallat angallatilluunniit aalisarnermut atorneqartussat allassimassallutik. § 6, imm. 1 malillugu piffissaa killilernagu aalisarsinnaanermut akuersissummut atatillugu ukiumoortumik pisassiissutinik nalunaarummi angallatit allassimassapput. Imm. 2. Aalisarsinnaanermut akuersissummi allannguutit, tassunga ilanngullugit piginnittuunermi pissutsit allanngorneri, Aalisarnermut, Piniarnermut Nunalerinermullu Naalaakkersuisumit akuerineqassapput."

Inussiarnersumik inuulluaqqusillunga



Ane Hansen

Uunga: Aalisarnermut, Piniarnermut Nunalerinermullu Naalakkersuisoqarfik

Uannga: Inatsilerinermi immikkoortortaq, Naalakkersuisut Siulittaasuata Naalakkersuisoqarfia

Ulloq: 2. maj 2012

Una pillugu: Sinerissap qanittuani qaleralinniarneq pillugu nalunaarummi, § 11, imm. 2, naammagittaalliornissamut piffissaliussaq

Allakkiq

1. Aallaqqaasiut

Sinerissap qanittuani qaleralinniarneq pillugu nalunaarummi, § 11, imm. 1 naapertorlugu pisassiissutinit pigisanik tunniussinernik aalajangiinerit naammagittaalliuutigineqarsinnaapput, naammagittaalliornissamut piffissaliussaq pillugu aalajangiinermi aalisarnerq pillugu inatsimmi tunngavissarititaq allakkiami matumani nassuiaatigineqarpoq.

2. Pissutsit piviusut

Sinerissap qanittuani qaleralinniarneq pillugu nalunaarummi 2. februar 2012-imeersumi, §11-imi allassimavoq, pisassiissutinit pigisanik tunniussinernik aalajangiinerit naammagittaalliuutigineqarsinnaasut. Naammagittaalliuut Aalisarnermut, Piniarnermut Nunalerinermullu Naalakkersuisoqarfimmut nassiunneqassaaq. Tamatuma saniatigut aalajangiunneqarpoq, naammagittaalliuut kingusinnerpaamik 1. maj Naalakkersuisoqarfimmi tiguneqarsimassasoq. Naammagittaalliuut ullup taassuma kingornatigut tiguneqarsimasoq suliarineqassanngilaq.

Tamatuma kingunerisaanik sinerissap qanittuani qaleralinniarneq pillugu nalunaarummi taamatut naammagittaalliornissamut periarfissamik aalajangersaanissaq, Aalisarnerq pillugu inatsimmi tunngavissaqarnerasoq, Inatsisartut ataatsimiititaliaata qularutigaa.

3. Nassuiaat

Sinerissap qanittuani qaleralinniarneq pillugu nalunaarummi §§-ini 9 -11-imut malittarisas-
sanut aalajangersakkanut tunngavissaq Aalisarnek pillugu Inatsimmi § 13, imm. 3-imi pigi-
neqarpoq, tassani aalajangersarneqarmat,

"Akuersissummik tunniussinissamik aalajangerniarnermut pingaaruteqartunik paaisstis-
siisarnissaq pillugu naalakkersuisut malittarisassiorsinnaapput."

Sinerissap qanittuani qaleralinniarneq pillugu nalunaarummi § 9-mi aalajangersarne-
qarpoq, Naalakkersuisut 1. marts imaluunniit tamatuma kingornatigut piaarnerpaamik aku-
ersissutininik pigisaqartut nalunaarfigissagaat, qaleralinniarnermi pisassiissutininik pigisanit
taaneqartunik pigisaqartut akuersissummik nutaamik tunineqanissaannik.

Nalunaarummi § 10-mi allaaserineqarpoq akuersissutininik pigisaqartut pisassiissutininik
pigisaannik aalajangersaanermi, paaisstutissat suut aallaavigineqartassanersut.

§ 11-imi inaarutaasumik aalajangersarneqarpoq, § 9 malillugu tunniussinermik naammagit-
taalliuuteqartoqarsinnaasoq kingusinnerpaamik 1. maj, taamaalillutik Naalakkersuisut ulloq
1. juli imaluunniit tamatuma kingornatigut piaarnerpaamik inaarutaasumik pisassiissutit
pigisat pillugit aalajangersaasinnaapput.

Pisassiissutinit pigisanit tunniussinermut atatillugu paaisstutissanik atugassanik pissar-
siniarnermi periaaseq, taamaalilluni §§-ini 9-11-imi malittarisassatigut aalajangersarne-
qarpoq. § 11, imm. 4-mi allassimavoq inaarutaasumik aalajangiinissaq aatsaat 1. juli pis-
sasooq tamatumaluunniit kingornatigut piaarnerpaamik. Tamatuma sionatigut utaqqii-
saagallartumik aalajangiisoqarsimappat, akuersissummik pigisaqartup 1. maj sioqqullugu
akuersissutininik tigusaqartut "naammagittaalliuutigisinnaasaannik" taamalu paaisstutissa-
nik nutaanik piviusorpalaartutut pissusilinnik saqqummersoqarsimappat.

Naak § 11, imm. 1-imi oqaaseq "naammagittaalliuut" atorneqaraluartoq, naammagittaal-
liuuteqarnissamut periarfissarpiaq tamatumani pineqanngilaq, tassaallunili akuersissummik
pigisaqartup paaisstutissanik allanik saqqummiussinissaminut periarfissaa, pisassiissuti-
nik pigisanik tunniussinermut atatillugu pingaaruteqartunik. Tamanna Aalisarnek pillugu
inatsimmi § 13, imm. 3 naapertorlugu piginnaatitaanermi ilaavoq, taamaattumillu Naalak-
kersuisut tamatumanerpiaq paaisstutissanik tunniussinermi malittarisassanik aalajanger-
saapput, akuersissutininik tunniussinernut pingaaruteqartunik. Sinerissap qanittuani qalera-
linniarneq pillugu nalunaarummi tassa § 11, imm. 1 aalangersakkatut paasineqassaaq,
paaisstutissanik piviusorsiorpalaartunik saqqummiussinissamik aalajanersaanissamut
kingusinnerpaamik piffissaliinertut. Tamanna Aalisarnek pillugu inatsimmut akerliunngitsu-
tut isigineqarpoq.

Aalisarnek pillugu inatsit tunngavissiiingilaq, nalunaarummi naammagittaalliuute-
qarsinnaanermut imaluunniit naammagittaalliuuteqarnissamik piffissaliinissamik aalajan-
gersaasinnaanermut. Naalakkersuisut tassaapput pisassiissutinit pigisat pillugit aalajan-
giisussat, sinerissap qanittuani qaleralinniarneq pillugu nalunaarummi §§-it 9 -11 naaper-

torlugit, aamma taamaattumik taama aalajangiineq pisortanut qulliunerusunut naammagittaalliutigineqarsinnaanngilaq.

4. Inerniliineq

Sinerissap qanittuani qaleralinniarnaq pillugu nalunaarummi §§-ini 9 -11-imi ataatsimoortumik aalajangiiniarneq allaaserineqarpoq. Nalunaarummi § 11, imm. 4 malillugu naammagittaalliuteqarsinnaanermut imaluunniit naammagittaalliuteqarnissamik piffissaliinissamut aalajangiinissaq pillugu aalajangersaasoqarsimanngilaq. § 11, imm. 1 tassatuaavoq paasissutissanik eqqortunik pissarsinnissamut periusissat ilaat, § 11, imm. 4 naapertorlugu inaarutaasumik aalajangiisoqannginnerani. Taamaattumik §§-ini 9 -11-mi aalajangersakkat Aalisarneq pillugu inatsimmi § 13, imm. 3-mi tunngavissaqartut isigineqarput.

Ellen Kjærgaard
Inatsisilerinermi immikkoortortaq



INATSIARTUT

ILANNGUSSAQ 2

Aalisarnermut, Piniarnermut Nunalerinermullu Naalakkersuisoq
Ane Hansen
/MAANI

Ulloq 19. maj 2012
Sags.nr.: 01.36.01.04-00013

Isumasioqatigiinnissamut ulloq 21. maj 2012 nal. 15.00-16.30 Aalisarnermut, Piniarnermut Nunalerinermullu Naalakkersuisumut Ataatsimiittarfik 2-mut aggersaaneq

Aalisarnermut, Piniarnermut Nunalerinermullu Ataatsimiititaliap (Aalisarnermut ataatsimiititaliap) maanna Inatsisartut aalisarneq pillugu inatsisaata allangortinneqarnera pillugu inatsisartut inatsisaattut siunnersuut suliaralugu ingerlappaa. Tamatumunnga atatillugu Ataatsimiititaliaq malitseqartitsilluni apeqquteqarnissamut pisariaqartitsivoq, taamaattumillu Aalisarnermut, Piniarnermut Nunalerinermullu Naalakkersuisoq ulloq 21. maj nal. 15.00-16.30 isumasioqatigiinnissamut aggersarlugu.

Ataatsimiititaliap apeqqtutit uku oqaaluusererusuppai:

- 1) Aalisarnermut, Piniarnermut Nunalerinermullu Naalakkersuisoq siusinnerusukkut ataatsimiititaliamut ilisimatitsinikuuvoq, naammagittaalliuutit suliarineqarneranut atatillugu TAC-mit 10 %-it agguaassassatut immikkoortinneqarnikuusut. Eqqortumik naatsorsorneqarpa, TAC-mit 20.500 tonsiusunit 10 %-t immikkoortinneqartut (aqutsisoqarfiusuni pingasuni Qeqertarsuup Tunuani, Ummannami aamma Upernavimmi pisassiissutit), t.i. 2.050 tonsit?
- 2) Taama annertutigisut Sinerissamut qanittumi qaleralinniarnaq pillugu nalunarummi § 11, imm. 2 aamma 3 naapertorlugit tunngavilersuutit malillugit taamaallaat naammagitaalliuuteqartunut agguaanneqassasut Aalisarnermut, Piniarnermut Nunalerinermullu Naalakkersuisup naatsorsuutigaa? Oqaatigineqarsinnaava napparsimaneq taamatut naammagitaalliuutinut tunngavilersuutit ilaatinneqarsinnaanersoq?
- 3) 2.050 tonsit ilaasa inuusuttunut aalisarnermut akuulerusuttunut, kisiannili aalisartunit allanit pisassanik pisinissamut immaqa akissaqanngitsunut immikkoortinneqarnissaat naleqqutissanersoq Aalisarnermut, Piniarnermut Nunalerinermullu Naalakkersuisoq Aalisarnermut ataatsimiititaliatuulli isumaqarpa?
- 4) Pisassiissutinit nammineq pigisat niuerutigineqarsinnaanerat qaqugu atutilissava? Ataatsimiititaliaq isumaqarpoq, inatsisissatut siunnersuummi pisassat qaffasinnerpaaffissaattut siunnersuutigineqartoq tamatumunnga apeqqutaanngitsvoq. Inaarutaasumik pisassiissutit pigisat 1.



INATSISARTUT

juli 2012 imaluunnit piaartumik tamatuma kingorna aalajangerneqareerpata niueruteqarsinnaalernerq atuutillisava? Imaluunniit niueruteqarsinnaanerq piviusungussava akuersissutit tunniunneqarnerat tunngavigalugu? Kingulleq atuutissappat ataatsimiititaliap paaserusuppaa, inatsisissatut siunnersuut aatsaat ulloq 1. juli 2012 atuutilersussatut naatsorsuutigineqartoq malillugu pisassiissutit qaffasinnerpaaffissaattut aalajangerneqartup 5 %-iusup inuit imaluunniit piginneqatigiiffiit pisassanik pigisanik toqqaannartumik imaluunniit toqqaannangitsumik pisinermikkut qaangerneqannginnissaat Aalisarnermut, Piniarnermut Nunalerinermullu Naalakkersuisup qanoq qulakkeerniarneraa?

5) Aalisarnermut ataatsimiititaliap isumaqarpoq, pisassiissutinit nammineq pigisanik niueruteqarsinnaaneramik aaqqissuussinerup atuutilersinneqarnera, pisassat nungunnissaasa tungaanut pisaqarneqqusaalluni aalisarsinnaaneramik aaqqissuussinermut sanillullugu aningaasaqarnikkut kaammattuinerit aallaavigalugit aalisartut aallussilissasut, taamaattumillu aqutsisoqarfiit akimorlugit killiliinertaqanngitsumik aalisarnerup aqunneqarnerata ajornakusoorsinnaanera malunniussinnaalluni. Ataatsimiititaliap siusinnerusukkut oqaatiginikuuaa, aalisartut aalisarnerminni tunuarsimaartut "pillarneqarnissaat" ajornartorsiutaasinnaasoq. Aamma aarleqqutigineqarsinnaavoq, aalisariutit anginerit sumiiffinni qalerallinnik anginerpaanik nassaasaqarfiusuni pisassanik nammineq pigisamik ilaannik imaluunnit tamakkerlugit aalisarniassagaat, assersuutigalugu Qeqertarsuup Tunuanit avannamukartassasut, tamatumalu kingorna pisassiissutit nungunneqarpata sumiiffimmi tassani aalisarnek unitsittariaqassalluni. Ukiup qanoq ilinera, sikumik silamillu pissutsit apeqqutaallutik sumiiffimmi tassani aalisarnek unitsinneqassappat, angallatillu mikinerpaat allamukartariaqalissappata, taakku pisassanik nammineq pigisaminnik aalisarsinnaanerata ajornartorsiutaalersinnaavoq. Aalisarnermut, Piniarnermut Nunalerinermullu Naalakkersuisoq tamatumunnga isumaqataava? Angallatit mikinerpaat aqutsisoqarfiit akimorlugit killiliinani aalisarsinnaanerannut "pillagannginnissaat" Naalakkersuisunut ilaasortap qanoq isumannaarniarpaa?

6) Aalisarnermut, Piniarnermut Nunalerinermullu Naalakkersuisoq Aalisarnermut ataatsimiititaliatuulli isumaqarpa, pisassiissutininik nammineq pigisanik aqutsisoqarfimmut aalajangersimasumut pituttugaasunik atuutilersitsinissaq naleqquttuusinnaasoq? Taamaallilluni aalisariutininik angisuunik piginnittut aqutsisoqarfinni arlaqartuni pisassanik pigisaqarsinnaassapput. Taamaattoqassappat taamatut aaqqissuussinikkut pisassat qaffasinnerpaaffissaat aqutsisoqarfimmut aalajangersimasumut atuuttoq aamma aqutsisoqarfiit akimorlugit ataatsimut pisassissutit qaffasinnerpaaffissaat pisariaqassapput.

7) Qaleralinniarnermi nutaamik aqutsineq pillugu paasitiniiaanermut atatillugu illoqarfiit nunaqarfiillu suut tikeraarneqarsimanersut Aalisarnermut, Piniarnermut Nunalerinermullu Naalakkersuisup ilsimatitsissutigisinnavaa?

Ataatsimiititaliap Naalakkersuisumik apersuinerani sammisat pillugit oqaloqatigiittoqarnissaa aammalu itisillilluni apeqquteqartoqartarnissaq naatsorsuutigineqassaaq.



INATSISARTUT

Naalakkersuisumik apersuinnermut atatillugu oqaasissat allattorsimaffiannik tigusaqarnissani Aalisarnermut, Piniarnermut Nunalerinermullu Ataatsimiititaliap kissaatigaa. Oqaasissat allattorsimaffiat kingusinnerpaamik Naalakkersuisumik apersuinnerup kinguninngua kalaallisut danskisullu qarasaasiakkut uunga nassiuteqquneqarpoq: julie@inatsisartut.gl.

Oqaasissat allattorsimaffiat nassarneqarpat taassuma danskisuaa Naalakkersuisumik apersuinnerup aallartinnerani ataatsimiititaliap oqaluttaanut tunniuteqquneqarpoq.

Inussiarnersumik inuulluaqqusillunga

Aqqaaluaq B. Egede

Ataatsimiititaliami Siulittaasoq,
Aalisarnermut, Piniarnermut Nunalerinermullu ataatsimiititaliaq



Aalisarnermut, Piniarnermut Nunalerinermullu Ataatsimiititaliaq
Ataatsimiititaliap siulittaasua Aqqaluaq B. Egede
/MAANI

21. maj 2012-imi ataatsimiititaliamik isumasioqateqarneq

19. maj 2012-imi ataatsimiititaliap isumasioqatigiinnissamut aggersaanera
innersuussutigalugu matumuuna ataatsimiititaliap apeqquai akissuteqarfigissavakka:

1) *Aalisarnermut, Piniarnermut Nunalerinermullu Naalakkersuisoq siusinnerusuklut ataatsimiititaliamut ilisimatitsinikuuvoq, naammagittaalliutit suliarineqarneranut atatillugu TAC-mit 10 %-it agguaassassatut immikkoortinneqarnikuusut. Eqqortumik naatsorsorneqarnera, TAC-mit 20.500 tonsiusunit 10 %-it immikkoortinneqartut (aqutsisoqarfiusuni pingasuni Qeqertarsuup Tunuani, Ummannami aamma Upernmavimmi pisassiissutit, t.i 2.050 tonsit?)*

Apeqqu 1-imut akissut:

Pisassiissutit ilaannit 10 %-it taakkua angallatinut 6 miiterit sinnerlugit angissusilinnut agguaassassanit tiguneqarput. Tassa katillugit 1.035 tonsiusut.

2) *Taama annertutigisut Sinerissamut qanittumi qaleralinniarneq pillugu nalunaarummi § 11, imm. 2 aamma 3 naapertorlugit tunngavilersuutit malillugit taamaallaat naammagittaalliuteqartunut agguaanneqassasut Aalisarnermut, Piniarnermut Nunalerinermullu Naalakkersuisup naatsorsuutigaa? Oqaatigineqarsinnaava napparsimaneq taamatut naammagittaalliutinut tunngavilersuutit ilaatinneqarsinnaanersoq?*

Apeqqu 2-mut akissut:

Eqqarsaataavoq pisassiissutit taakkua akuersissummik pigisaqartunut pisassiissutinillu namminneq pigisaminnik naliliiffiqartussanut agguaanneqassasut. Uppernarsaatip paatsuugassaannngitsumik erseqqissassavaa, aalisagartassat annaaneqartut pillugit akisussaaffik akuersissummik pigisaqartumut tutsinneqarnani taamaallaat allamut tutsinneqassasoq. Piffissami sivirusumi napparsimaneq, akuersissummik pigisaqartup piffissami naatsorsulffiusumi ukiumut agguaqatigiissillugu aalisagartassaanut pingaaruteqartoq, pisassiissutit nammineq pigisat nalilersoqqinneqarnissaanut tunngavilersuutaasinnaavoq.

3) *2.050 tonsit ilaasa inuusuttunut aalisarnermut akuulerusuttunut, kisiannill aalisartunit allanit pisassanik pisinissamut immaga akissaqanngitsunut immikkoortinneqarnissaat naleqqutissanersoq Aalisarnermut, piniarnermut Nunalerinermullu Naalakkersuisoq Aalisarnermut ataatsimiititaliatuulli isumaqarpa?*

20. maj 2012
Sagsnr. 2012-061106
Dok. Nr. 911817

Postboks 269
3900 Nuuk
Tlf. (+299) 34 50 00
Fax (+299) 34 63 55
E-mail: apnn@nanoq.gl
www.nanoq.gl

Apeqquut 3-mut akissut:

Naalackersuisut siunertarivaat, aalisarnermut inatsisip nutarterneqarnerata aappassaanik suliarineqarneranut atatillugu kinguaariit nikinnissaat pillugu apeqquut qaqilerneqassasoq. Maannakkut naleqquttuosorineqanngilaq, inuusuttunut aalisarnermut akuulerusuttunut pisassiissutit ilaannik taamatut immikkoortitsisarnissaq.

4) Pisassiissutinit nammineq pigisat niuerutigineqarsinnaanerat qaqugu atuutilissava? Ataatsimiititaliaq isumaqarpoq, inatsisissatut siunnersuummi pisassat qaffasinnerpaaffissaattut siunnersuutigineqartoq tamatumunnga apeqquutaanngitsaq. Inaarutaasumik pisassiissutit pigisat 1. juli 2012 imaluunniit piaartumik tamatuma kingorna aalajangerneqareerpata niueruteqarsinnaalerneq atuutilissava? Imaluunniit niueruteqarsinnaaneq piviusunngussava akuersissutit tunniunneqarnerat tunngavigalugu? Kingulleq atuutissappat ataatsimiititaliap paaserusuppa, inatsisissatut siunnersuut aatsaat ulloq 1. juli 2012 atuutilersussatut naatsorsuutigineqartoq malillugu pisassiissutit qaffasinnerpaaffissaattut aalajangerneqartup 5 %-iusup inuit imaluunniit piginneqatigiiffiit pisassanik pigisanik toqqaannartumik imaluunniit toqqaannangitsumik pisinermikkut qaangerneqannginnissaat Aalisarnermut, Piniarnermut Nunalerinermullu Naalackersuisup qanoq qulakkeerniareraa?

Apeqquut 4-mut akissut:

Pisassiissutinit nammineq pigisat akuersissutit tunniunneqarneratigut niuerutigineqarsinnaapput. § 15, imm. 2 naapertorlugu pisassiissutit nammineq pigisat allanut tunniunneqartut tamarmik Naalackersuisunit akuersissutigineqassapput, tassungalu atatillugu Naalackersuisut naliliinerminni pissutsit suliamut attuumassuteqartut tamaasa ilannguttassavaat, inunnut aamma/imaluunniit piginneqatigiiffinnut ikittuinnarnut pisassiissutit nammineq pigisat katersuunneqannginnissat pillugu ataatsimiititaliamit kissaatigineqartut ilanngullugit.

5) Aalisarnermut ataatsimiititaliaq isumaqarpoq, pisassiissutinit nammineq pigisanik niueruteqarsinnaanermik aaqqissuussinerup atuutilersinneqarnera, pisassat nungissaasa tungaanut pisaqarneqqusaalluni aalisarsinnaanermik aaqqissuussinerup sanilliullugu aningaasaqarnikkut kaammattuinerit aallaavigalugit aalisartut aallussilissasut, taamaattumillu aqutsisoqarfiit akimorlugit killiliinertaqanngitsumik aalisarnerup aqunneqarnerata ajornakusoorsinnaanera malunniussinnaalluni. Ataatsimiititaliap siusinnerusukkut oqaatiginikuuaa aalisartut aalisarnerminni tunuarsimaartut "pillarneqarnissaat" ajornartorsiutaasinnaasoq. Aamma aarleqqutigineqarsinnaavoq, aalisariutit anginerit sumiiffinni qaleralinnik anginerpaanik nassaassaqarfiusuni pisassanik nammineq pigisamik ilaannik imaluunniit tamakkerlugit aalisarniassagaat, assersuutigalugu Qeqertarsuup Tunuanit avannamukartassasut, tamatumalu kingorna pisassiissutit nungunneqarpata sumiiffimmi tassani aalisarneq unitsittariaqassalluni. Ukiup qanoq ilinera, sikumik silamillu pissutsit apeqquutaallutik sumiiffimmi tassani aalisarneq unitsinneqassappat, angallatillu mikinerpaat allamukartariaqalissappata, taakku pisassanik nammineq pigisaminnik aalisarsinnaanerat ajornartorsiutaalersinnaavoq. Aalisarnermut, Piniarnermut Nunalerinermullu Naalackersuisoq tamatumunnga isumaqataava? Angallatit mikinerpaat aqutsisoqarfiit akimorlugit killiliinani aalisarsinnaanernut "pillagaannginnissaat" Naalackersuisunut ilaasortap qanoq isumannaarniarpa?

Apeqquut 5-imut akissut:

Erseqqissaassutigineqassaaq killeqanngitsumik aalisarnissaq pineqanngimmat. Qaleralinniameq pisassiarnikkut ingerlanneqarpoq, tassa pisassiissutit nunguppata aalisarneq unitsinneqartussaavoq. Naalakkersuisut anguniagarinngilaat aalisarnerup allatut aqunniarsarineqarnissaa, tassa tamatumunnga ukiup qanoq ilinera kiisalu sikumik silamillu pissutsit apeqqutaasaqimmata. Ingerlatseriaatsit nutaat malillugit aalisariutit mikinerpaat (umiatsiaaqqat) aalisariutinut anginerpaanut unammillersinnaanngillat, taakkuli pisassanik minnerpaaffilikkaniq tunineqarnissaat qulakkiigaavoq.

6) Aalisarnermut, Piniarnermut Nunalerinermullu Naalakkersuisoq Aalisarnermut ataatsimiititaliatuulli isumaqarpa, pisassiissutinik nammineq pigisanik aqutsisoqarfimmuut aalajangersimasumut pituttugaasunik atuutilersitsinissaq naleqquttuusinnaasoq? Taamaalilluni aalisariutinik angisuunik piginnittut aqutsisoqarfinni arlaqartuni pisassanik pigisaqarsinnaasapput. Taamaattoqassappat taamatut aaqqissuussinikkut pisassat qaffasinnerpaaffissaat aqutsisoqarfimmuut aalajangersimasumut atuuttoq aamma aqutsisoqarfiit akimorlugit ataatsimut pisassissuutit qaffasinnerpaaffissaat pisariaqassapput.

Apeqquut 6-imut akissut:

Periarfissaq tamanna nalilersorneqarnikuuvoq, Naalakkersuisulli isumaqarput, angallatit ataasiakkaat aqutsisoqarfinni assigiinngitsuni pisassiissutinik nammineq pigisaqarsinnaanerat siunertamut naleqqutinngitsooq. Tamannami aalisartunut kingunerlutsitsissaaq, aamma pisariaqanngitsumik illuatungeriit tamarnik allaffissortinneqassapput. Pingaarnepaavoq, aqutsisoqarfinni tamani pisassiissutit aalajangersarneqarnissaasa qulakkeerneqarnissaat, taamalu aaqqiinissamik suliniutit sapinngisamik ikinnerpaat, eqaannerusumik aalisarnermik qulakkeerinnaasut, aqqutigalugit pisassiissuteqartarneq atorlugu aalisartoqarsinnaalluni.

7) Qaleralinniarnermi nutaamik aqutsineq pillugu paasititsiniaanermut atatillugu illoqarfiit nunaqarfiillu suut tikeraarneqarsimanersut Aalisarnermut, Piniarnermut Nunalerinermullu Naalakkersuisup ilisimatitsissutigisinnaavaa?

Apeqquut 7-imut akissut:

Aasiaat, Ilulissat, Qasigiannuit, Ummannaq, Upernavik, Saattut, Ikerasak aamma Qaarsut tikinneqarput.

Aasianni aalisartunik ataatsimeeqateqarneq najukkami radiukkuut aallakaatinneqarpoq KNR-milu aallakaateqqinneqarluni.

Upernavimmi ataatsimiinneq nunaqarfinni radiukkuut aallakaatinneqarpoq. KANUAANA-mit nalunaarut malillugu, radiukkuut aallakaatitsineq nunaqarfinnit malinnaaffigineqartoq iluatsilluarsimavoq.

Naggataatigut paasissutissiissutigissavara, quppersagaaqqat plakatillu atorlugit paasissutissanik sanasoqarsimammat, taakkua illoqarfinnut nunaqarfinnullu tamanut nassiinneqarput, soorlu nuna tamakkerlugu radiukkuut TV-kkullu paasissutissanik saqqummiussisoqartartoq.

Siunertaavoq, ukiumi matumani kingusinnerusukkut illoqarfinnut nunaqarfinnullu tamanut sapinngisaq tamaat angunniarnissaq. Aammattaaq 1979-ip kingornali siullermeersumik, ingerlatsinerup annertuumik allanngortinneqarneranut atatillugu aatsaat taama annertutigisumik paasititsiniaasoqarpoq.

Inussiarnersumik inuulluaqqusillunga

A handwritten signature in black ink, consisting of several fluid, connected strokes that form a stylized representation of the name Ane Hansen.

Ane Hansen